

南疆逸史

南疆逸史卷二

烏程溫睿臨撰

紀略第二

紹宗

紹宗襄皇帝諱聿鍵小字長壽太祖九世孫也其先唐定王高帝第二十二子封於南陽父義唐世子追封裕王母毛氏帝生十二歲祖端王感於嬖妾囚世子承奉所帝亦從之有大志好讀書雖處患難而志氣不挫年二十八尚未請名世子為其弟毒死端王諱之將傳國於次子分守道陳奇瑜入弔謂王曰世子薨逝不明若又不立其子事且露國法重王懼始為帝請名立為世孫崇禎五年王薨襲王位年三十一

矣選妃曾氏諸生曾文彥女七年流寇入河南南陽當其衝
城庫薄王捐千金謀修築知府陳振豪弗受工王上言詔逮
振豪下獄王乃拔潞王事請增兵三千人設參將一員以陳
永福充之不許八年冬賊再犯南陽上疏言臣府護衛一千
三百人近制以其半為汴梁班軍給撫臣以下縣使無誤惟
明詔念臣困阨以全軍見還懷宗報之曰南陽番軍班直祖
制已久朕不敢變時欲行宗室換授之法陳子壯署禮部事
執不可王貽書子壯相駁難其書稱說典訓援拒經傳皆有
本廷臣顧弗及知特以為諸侯王尚氣持異同而已子壯尋
下獄衆口惜子壯者輒以尤王王亦薄諸公卿為不足重而
爭宗藩體統劾總督盧象昇不朝其所建請煩多與羣臣相

狀摺懷宗意亦不之善也九拜八月京師戒嚴王率護軍勤
王汝南道周以典止之不聽至裕州巡按御史楊繩武以聞
旨下切責會先鋒值寇亡內豎三人乃返國十二月下禮部
議廢為庶人安置鳳陽高墙押發官同知張有度欲以櫪車
行王自裁不殊至鳳陽守陵奄人索賄不得城鎖以困苦之
不勝其辱病幾殆曾妃割股以進始愈有司糜祿不時資用
乏絕時有望氣者以高墙中有天子氣言於淮撫路振飛振
飛假賑罪宗名入見王心獨異之王告以吏虐狀振飛上疏
請加罪宗恩贍以私錢且責吏之無狀者石應詔宏光登極
大赦王出高墙命徙駐廣西之平樂府乙酉五月至杭州而
南都不守王勸潞王監國拒北使之招降者不聽時靖虜伯

鄭鴻達自京口戶部主事蘇觀生自南都胥會於杭遂奉王
入閩六月甲戌次浦城禮部尚書黃道周三策觀進閩六月
癸未福建各官迎謁於水口驛巡撫張肯堂巡按吳春枝布
政司夏尚綱南安伯鄭芝龍等會議監國鴻達道周以為不
正大位無以號召天下且杜後起遂定議奉王即位王出御
用銀一百五十兩令有司葺行宮勿擾民丁亥至福建州行
在太廟社稷丁未祭告天地祖宗即皇帝位於南郊以福建
為福京福州為天興府布政使為行殿大赦改元隆武追尊
皇考為皇帝妣為皇后遣上宏光尊號曰聖安皇帝進封靖
虜伯鄭鴻達定虜侯南安伯鄭芝龍平虜侯並賜號奉天靖
運中興宣力定難守正功臣上柱國特進光祿大夫賜鐵券

其弟鄭芝豹澄濟伯鄭彩永勝伯以黃道周為吏部尚書武英殿大學士蘇觀生為禮部右侍郎兼東閣大學士張肯堂吏部尚書夏尚綱戶部尚書曹學佺禮部尚書吳春枝兵部尚書周應期刑部尚書鄭垣工部尚書何楷左都御史並賜號奉天翊運中興宣猷守正文臣各官陞賞有差自黃道周而外凡有聲望者何吾驂蔣德璟黃景昉朱繼祚林欽楨姜曰廣吳甡高宏圖路振飛曾櫻鄭三俊熊開元黃士俊顧錫疇陳子壯皆為大學士然多遙授至者數人而已其後以林增志李光春同入閣辦事又晉封芝龍平國公鴻逵定國公封芝龍部將施天福武毅伯林習山忠定伯張進忠匡伯陳祥忠靖伯鴻逵部將陳豹忠勇侯林察輔明侯上性儉素少

遭患難既即大位慨然以復仇雪恥為務布衣蔬食不御酒
肉敕司禮監行宮不得以金玉玩好陳設器用磁錫幃幄被
被褥皆布帛絕去錦繡後宮無妃御執事者三十人而已中
宮懿旨選女廚十人上聞之以為擾民不許勤於聽政批閱
章奏丙夜不休上書陳言及以軍國大事奏者輒以手詔答
之東風節喜文學收召名士不次用人其志欲有為於天下
而托於時勢是時浙西已降附浙東奉魯王監國而
大清兵方在江楚楊廷麟萬元吉等以義師往來扞禦皆加
閩部督師銜以龍之李自成為九宮山民所誅楚督何騰蛟
收降其黨李錦等皆加總兵官賜名忠貞營為御營先鋒而
內制於鄭氏不能出關與之相應援也初上優禮鄭氏以閩

事屬之芝龍長子森入見上奇其表賜姓名曰朱成功命提督禁旅照駙馬都尉禮統行事芝龍議戰守事宜自仙霞關外當守者一百七十餘處守兵戰兵略計二十萬合閩粵餉不支一年乃請於兩稅內米一石預借銀一兩遣侍郎科道徵發吏部主事王兆熊兼御史督義餉迫急不輸者榜其門不義於是閩里騷然矣芝龍又請清理寺田可得餉銀八千萬上不聽戶部侍郎李長倩請開事例從之設儲賢館定十二科取士以蘇觀生領之既而招徠者多扶邪之士上亦厭而罷之上以盜賊之興皆由貪吏欲以高皇帝之法懲之建陽知縣施燦以貪酷被劾特敕誅之輔臣申救不聽上賜宴大臣芝龍自以侯爵欲位首輔上黃道周以祖制武職無班

文臣右者爭之終先道周芝龍快快不樂道周乃自請出關
號召義旅圖恢復許之請兵請餉芝龍皆不應僅給羸卒千
人費一月餉七月辛未道周率以行八月乙酉頒祖訓五十
七條本於閣部科道大學士林欲輯率諸臣表謝庚寅命肅
鹵伯黃斌卿出鎮舟山命吳江諸生孫久中費手詔召淮撫
路振飛錄舊恩也壬辰冊妃曾氏為皇后贈后父曾文彥吉
水伯癸巳命婦朝后於大和殿行保甲法於天興府定錦衣
衛軍制設中前後左右五所每軍百戶曰戚一所八戚名曰
禁軍時軍事皆掌於鄭氏而芝龍殊無意出關上屢諷之則
以餉乏為辭江楚之迎駕者疏踵至上以芝龍為不足恃欲
入楚倚何騰蛟會前知川金堡朝於行在勸上親征上大喜

立擢堡兵科給事中於是決計自贛入楚甲子類於上帝乙未禮於太廟丙申禡於社丁酉以鄭鴻逵為御營左先鋒出浙江鄭彩為御營右先鋒出江西駕幸西郊行授鉞禮先期為壇設天帝高皇帝位上御翼善冠詣壇所百官陪位武臣戎服聽事上皮弁升壇拜謁立於神位西南面御營先鋒北面跪兵部授鉞上東向揖之賜餞光祿寺授爵御營先鋒跪酌上誠勞畢謝恩出率將士跪壇下上甲冑誓師乃鳴金鼓揚旌而出當授鉞時風雨晦冥大風起壇上燭皆滅神位仆鴻逵出城馬蹶踣地識者以為不祥靖江王嘉亨僭位於桂林九月兩江總督丁魁楚遣總兵陳邦傳擒之封魁楚平粵伯晉廣西巡撫瞿式幫兵部右侍郎兼都察院副都御史

十月遣兵科給事中劉中藻頒詔浙東魯王不受詔自是與浙東相左惟方國安朱大典二人中立來受職焉十一月下詔親征以唐王聿錫鄧王器塙監國大學士曾櫻協同鄭芝龍留守以吳震文為隨征兵部右侍郎王觀光為隨征戶部侍郎皆兼吏戶禮三部事張家玉陳履貞為隨征兵科皆兼吏戶禮三科事命曹學佺脩思宗實錄設蘭臺館以處之十二月甲申上戎服登舟大學士何吾騶等隨行舟次茅江五日百姓壺漿迎者沿道皆賞以銀牌因駐蹕建甯王寅黃道周潰於婺源被執劉同陞卒以萬元吉為南贛巡撫二年正月乙酉朔上在建甯不受朝賀以三大罪自責百官皆戴罪從征交趾日本皆遣使入貢鴻達部將黃光輝守關

外

大兵攻之敗回鴻遠拒仙霞關檄諸路收兵上聞之大怒遣
官封劍即軍中斬光輝鴻遠惶恐上疏謝械光輝至行在乃
赦之馬士英叩關求入朝上數其罪諭守關兵勿納士英七
疏自理終不許邵武知府吳士瑋推官朱健以敵未至先棄
城逃下獄誅監國魯王遣柯夏卿曹維才來聘上加夏卿兵
部尚書維才光祿寺少卿手敕謂朕無子王為皇太姪同心
戮力共拜孝陵朕有天下終致於王取浙江所用職官同列
朝籍不分彼此尋遣僉都御史陸清源解餉十萬犒軍馬士
英在方國安營陰嘆國安殺清源而掠其資以蘇觀生兼吏
兵二部尚書行在文淵閣大學士出為經略賜尚方劍便宜

行事上親祖於殿門賜銀印曰將軍南北山陵安集軍民文武召見泉州布衣蔡鼎按為軍師二月詔寬逆案之禁上曰北京陷於東林南都亡於魏黨厥罪維均今中興之初喜與維新其附璫諸臣慨予洗滌以收後效擢堵胤錫都察院右副都御史巡撫湖廣丁亥大雨雹闕所無也廣西有僧自稱宏光上召九卿科道議將迎請廷臣曰即真宏光甫經失國有尊奉而無迎請已而有司審知其偽也下獄誅亨嘉俘至福京下諸王議廢為庶人以繼死誅其臣顧炎吳之琮楊國威張鳳翼等三月戊申朔督師大學士黃道周殉節於南京上聞慟哭輟朝贈文明伯上將出汀州入贛芝龍使軍民數萬人遮疏道呼擁駕不得行芝龍因其表請回天興上不得

已駐蹕延平辛未吉安陷鄭彩棄廣信奔入闕未幾撫州陷
初汀邵間大有帽山洞蠻最强屢征不復永[圖]王誘之出降
以與

清兵戰屢捷遂復撫州

清兵圍之鄭彩屯廣信永[圖]王請救其監軍給事中張家玉
以三營往撫圍暫解已而復合彩軍潰撫州遂破永[圖]王死
之峒蠻亦散報至行在大震上削彩職載罪立功命鄭成功
出巡關晉封忠孝伯挂招討大將軍印敕自召募扈駕西出
鄭鴻逵上疏切諫不聽廷麟元吉還守贛州

人兵遂進攻之四月初五日萬壽節上不受朝賀命禮臣追
復建文帝年號立忠孝臣方孝孺等祠五月琉球入貢廷試

貢士取萬荆等十二人命為萃士照庶吉士例送翰林院教習陞湖廣監軍道章曠為都察院右僉都御史巡撫湖北兼魯監國使都督陳謙謙奉命入閩久駐衢州持兩端自云魯已封靖夷伯欲以邀封上召入閩御史錢邦芑劾之遂下獄將殺之芝龍與謙有舊亟入朝請以官贖謙死上放留芝龍久語而促行刑芝龍出已死矣芝龍厚殮之由是益懷異志加吏部尚書郭維經六省督師銜募兵援贛六月福京鄉試上命廣額七十名流寓者皆入試以編修劉以脩閩肅為主考取葉纘等一百七十五名士子多以賄進乃命復試落四名逮同考推官王三俊下獄追賍一萬兩浙東師潰魯王航海鴻遠逃歸浦城事聞上奪其封爵七月元子生大赦加恩

從龍諸臣悉進爵御史錢邦芑言浙東新破唇亡齒寒舉朝
同仇之日非草恩受賞時也不報己巳上御門內侍奉小匣
置御前上諭羣臣曰朕本無利天下之心以勛輔擁戴不得
已勉徇羣情浣衣糲食有何人君之樂朝夕乾惕恐負重副
豈意諸臣已變初志昨巡關之使得爾等出關迎降書百餘
封今具在此朕不欲知其名姓者也命錦衣衛焚之午門前
爾諸臣其有名者當洗心滌慮否則亦竭節奉公不渝終始
是所望也上長身豐頤聲如洪鐘聞者皆聳息上銳志出師
而芝龍百計沮之欲留上以自重既而陰通款於洪承疇盡
撤關隘水陸之兵

大兵既陷浙東長驅而前八月朔從景園關入郡縣望風降

附何騰蛟遣郝永忠以鐵騎五千迎駕將至韶州而

大兵已陷衡州入關矣二十三日丁酉

大兵至延平上先一日啟行如汀州庚子入城九月辛丑朔
上駐汀州將至江西命忠誠伯周之藩護曾后先行出西門
大兵追至羅漢嶺之藩戰死后自投於水上戎裝將發

大兵猝至從官迸散見害於都司署粵中立國上尊號曰思
文皇帝或曰汀州代死者為張致遠上實未死其從亡之臣
賴核熊緯其後朱成功屯兵鼓浪嶼有遺使存問諸臣者云
為僧於五指山錦衣衛陸昆亨力辨其偽云永曆十一年上
諡曰紹宗襄皇帝后曰襄皇后

逸史曰帝英才大略在藩服之時已思有所施為及遭逢患

難唐礪愈堅南京既覆枕戈泣血躬行節儉以裕兵食性喜
文詞手撰三詔御制祖訓後序行在縉紳便覽序皆典雅可
誦所至訪求書籍親征亦載書數十乘聽納諫說拔錢邦芑
金堡於下僚置之言路欲其有所開陳奏章朝至夕發或送
后代批后亦讀書通明識治體上嘗與決事萬念舊恩不遺
纖微於從龍諸臣恩澤尤渥不可謂非天生之令主也論者
徒見其不能出關遂言其好作聰明自為張大無人君之度
此以成敗論者夫鄭氏起盜賊目無君上據有全閩富貴已
盈始念亦不及此而欲責以鞠躬盡瘁經營天下難矣帝之
託於鄭氏所謂祭則寡人而已其二三心膂之臣所藉以恢
復者如黃道周蘇觀生皆儒雅可觀將略未優又束縛其手

足不能一展所長悲夫悲夫天之所廢誰能興之雖有忠義
如之何哉

南疆逸史卷二

大興傅氏長恩閣鈔本

南疆逸史卷三

烏程溫睿臨撰

紀略第三

永曆帝

永曆皇帝諱由榔神宗之孫桂恭王常瀛少子也常瀛李貴妃出萬曆二十九年封熹宗天啟七年始就國衡州衡在江湖之表地僻遠崇禎九年封由榔永明王十六年張獻忠陷衡州桂王由永州入粵西王被執繫道州征蠻將軍楊國威遣部將焦璉率兵至負王渡河得免明年桂王薨於蒼梧遂葬焉陵頭長子安仁王由搜襲封未幾亦薨丙戌春思文帝遣司禮監太監龐天壽冊王為桂王居肇慶府秋七月福京

不守兩廣總督丁魁楚廣西巡撫瞿式耜巡按御史王化澄
與故大臣呂大器李永茂等議所立先是思文帝常語羣臣
曰永明神宗嫡孫正統所係朕無子後當屬諸乃共推永明
王太妃王氏曰諸君何患乎無君吾兒仁柔非撥亂才也願
更擇其可也魁楚等請之堅遂以十月壬辰監國肇慶祭告
天地宗廟加魁楚東閣大學士晉式報吏部右侍郎東閣大
學士攝尚書事永茂請終制化澄等皆進爵甲辰湖廣督師
大學士何騰蛟巡撫兵部右侍郎堵胤錫等上表勸進優詔
答之司禮監王坤至自汀州知隆武帝已蒙塵羣臣具奏請
即大位是月四日

大清兵破贛州丁魁楚聞敗倉卒羣監國走梧州故大學士

蘇觀生遺書魁楚欲預擁戴魁楚拒之觀生乃自南韶還師十一月癸卯朔立唐王弟聿錡於廣州改元紹武以與肇慶相拒甲寅王還肇慶庚申即皇帝位以明年為永曆元年追尊皇考曰端皇帝尊繼母太妃王氏為皇太后生母馬氏為皇太妃冊妃王氏為皇后上隆武帝尊號曰思文皇帝大赦封皇太后弟王國璽武靖伯皇后父王略長洲伯太妃姪馬九功鎮遠伯使給事中彭耀宣諭廣州觀生殺之乃以兵部侍郎林佳鼎督總兵李明忠龍倫蘇聘等討之戰於三水唐王兵敗十二月甲辰復戰於海口佳鼎敗沒肇慶大震復以王化澄為兵部侍郎往督師起李永茂為大學士未幾亦敗去是月

大清巡撫佟養甲總兵李成棟由福建趨潮惠俱下之丁亥
潛師襲廣州執聿鐔觀生自縊聿鐔與周益遠等二十四王
皆及於難報至肇慶瞿式耜請守峽口司禮監王坤難之乃
以朱治澗為兩廣總督守肇慶王出幸梧州

大清兵取川北張獻忠伏誅

丁亥永曆元年春正月癸卯朔上至梧州李成棟分兵徇南
韶自率兵向肇慶朱治澗走肇慶降上由梧州走平樂丁魁
楚辭入岑溪縣守險王化澄走潯州成棟別將楊大福張月
等下高廉雷三府癸亥上入桂林欲幸楚遣使湖南慰勞督
師定興侯何騰蛟並等趣其兵入衛乙丑梧州陷廣西巡撫
曹煒降兵科給事中陳邦彥起兵於高明原任兵部右侍郎

張家玉起兵於東莞徵四川吏部尚書文安之雲南吏部侍郎王錫襄入閣不至乃以翰林學士方以智為東閣大學士入直未幾為僧去錫襄尋為沙定洲所殺是時獻忠部將孫可望等由川貴入雲南魁楚為追騎以所及降李成棟殺之於藤江平樂亦不守桂林聞報大恐會武岡鎮劉承胤兵至全州即赴之二月丙戌上幸全州瞿式耜諫不聽因自請保桂林乃以式耜兼吏兵二部尚書督師留守以總兵新興伯焦璉兵隸麾下封劉承胤安國公馬吉翔郭承吳巖雲從等皆為伯以禮部尚書吳炳兼東閣大學士入閣辦事劉承胤以三千人援桂林自奉_上歸武岡三月癸亥上至武岡改為奉天府以岷府為行宮

大清兵攻桂林守將焦璉擊却之是時長沙常德俱失何騰蛟與郝永忠等還保衡州張先壁走寶慶堵胤錫走永甯衛忠貞營李赤心等攻荊州不克潰入歸巫兩江間馬進忠王有才等遁五溪山中武岡遠在寶慶西倚水嶺以為重承胤遂專恣六月庚午朔何騰蛟朝行在上慰勞再三賜金幣大學士陳子壯起兵於九江鎮秋七月甲辰率舟師圍廣州不克命騰蛟督諸鎮兵守衡州已破永忠等南走騰蛟還保永州湖南巡撫章曠卒於軍八月己巳朔以戶部侍郎嚴起恆為東閣大學士壬午

大清兵破寶慶劉承胤拒戰敗績遂降馬吉翔等奉土反兩宮斬關出連夜走靖州商邱伯侯性將兵入衛由通道縣入

蠻境出古泥以達柳州大學士吳炳庵從不及死之九月李
成棟破清遠兵科給事中陳邦彥被執不屈見害冬十月土
司覃鳴珂與守道龍文明相攻遂陷柳州大掠矢及上舟丁
丑上走南象川兵部尚書張家玉兵敗死之時

大兵已定湖南西入黎平永州亦破郝永忠盧鼎等俱入桂
林何騰蛟與嚴起恆隨至與留守瞿式耜議分地給諸鎮卑
自為守式耜已督焦璉兵復陽朔及平樂府陳邦傳亦由濱
州復潯州合兵復梧州粵西既定屢請上入桂林十一月丁
酉朔上回桂林式耜與嚴起恆王化澄並入直騰蛟督師出
全州

大清兵破高明大學士陳子壯被執不屈磔死

戊子二年春正月丁酉朔上在桂林四川巡按御史錢邦芑
疏報四川全省懷定九州一百二十餘縣上視朝受賀封王
祥等為侯伯陞邦芑右僉都御史癸亥江西提督金聲桓王
得仁以南昌內附二月廣東總兵李成棟以廣東內附郝永
忠之兵潰於興安丁亥入桂林大掠上夜半走南甯何騰蛟
在永甯聞警馳回與式報同調諸鎮兵入城守禦之三月己
丁巳

大清兵至桂北門騰蛟等拒戰却之

清帥聞江西反遂旋師聲桓使人間道賫佛經置密疏其中
赴南甯輸款以翰林學士朱天麟為東閣大學士閏三月丙
寅朔皇子慈烜生大赦王皇后出也夏四月乙未朔遣吏部

侍郎吳貞毓商邱伯侯性教勞李成棟於廣東封惠國公並封佟養甲襄平伯五月何騰蛟復全州壬午復寶慶府六月甲午朔駕幸潯州封邦傳慶國公秋七月甲子朔次梧州謁興陵成棟請上移駐廣東使其將羅成耀將甲士五千迎駕瞿式邦請回桂林眾議肇慶監國之地居兩省中遂移居焉八月癸巳朔駕幸肇慶拜成棟朔明大將軍以其子李元胤為錦衣衛指揮使掌絲綸房事袁彭年為左都御史彭年以廣東布政使與成棟密謀內附者也朱容藩僭稱監國於肇州督師呂大器命川將李占春誅之九月召舊輔何吾騶黃士俊入閣冬十月何騰蛟攻永州衡州克之李成棟命其子元胤以兵三千宿衛遂為禁旅是時江西廣東俱復惟贛州

為高進庫所守金聲桓使王得仁攻之不能克命成棟率師
師助之比成棟至而

大清兵已抵南昌得仁還救成棟戰不利還屯南康十一月
殺佟養甲李赤心破

清帥線國安於湘潭遂復益陽湘潭湘鄉衡山等縣堵胤錫
率師圍長沙十二月辛卯朔封李元胤南陽伯馬吉翔文安
侯

大清兵至長沙諸將潰騰蛟還保湘潭

己丑三年春正月庚申朔上在肇慶壬申朱天麟罷戊寅南
昌破金聲桓王得仁皆死二月庚辰朔湘潭破馬進忠敗走
何騰蛟被執不屈死之李成棟亦敗於信豐渡河墮水死事

聞贈騰蛟中湘王成棟齊夏王聲桓南昌王設壇祭之以杜
永和為兩廣總督駐廣州羅成耀守南雄忠貞營之衆亦潰
於茶陵由道州入粵西堵胤錫以胡一青趙印選兵守衡州
三月

大清兵至擊敗之胤錫走道州衡永二州俱不守四月孫可
望疏請封王廷議持不可孫可望自丁亥春入滇拒全省稱
國主以干戈紀年其黨李定國等抗不相下雲南監軍楊畏
知誘之來歸請封久不報武康伯胡執恭駐思恩便宜矯冊
印入滇封可望為秦王而肇慶不知也六月己丑朔堵胤錫
至肇慶加文淵閣大學士封光化伯使招李赤心等出楚七
月封可望為平遠王賜名朝宗劉文秀李定國文能奇皆等

為公可望却不受冬十月癸丑馬進忠王進才克武岡乙卯
克寶慶靖州何吾騶王化澄罷封黔鎮皮熊為匡國公滇鎮
王祥為忠國公防滇也十一月辛巳督師大學士堵胤錫卒
於潯贈鎮國公十二月戊申以史官廷員上親試士取劉藩
錢秉鐙楊在李來吳龍楨姚子莊徐宏猷楊致和八人俱授
庶吉士

大清兵入粵東羅成耀自南雄遁回

庚寅四年春正月乙卯朔上在肇慶乙未聞庾闢不守問備
禦之策無對者辛酉上登舟戊辰韶州復破辛未上西幸命
戎政尚書劉遠生給事中金堡宣諭廣州諸將令杜永和出
師留馬吉翔李元胤居守庚辰上至梧州駐舟江干內閣大

黃士俊以疾歸召朱天麟入直二月

大清兵至廣州圍之調陳邦傳高必正等東援丁亥戶部尚書吳貞毓等合疏論袁彭年金堡丁時魁蒙正發劉湘客朋黨誤國十大罪上以彭年反正有功置不問餘下錦衣獄遣戍戍戍

大清兵破武岡馬進忠還守靖州五月必正與邦傳有隙率所部西回惟邦傳東出屯肇慶馬寶等襲清遠敗歸李元胤馬吉翔進駐三水觀望不敢進而潮州郝尚久惠州黃應傑俱已降廣州被圍日久不能救惟進封杜永和為侯以虛名慰勞而已六月文安之入朝命入閣辦事八月孫可望復遣使至梧州自稱秦王且以不願改號為請付從官集議九月

可望由雲南東襲貴州執皮熊又使賀九儀襲遵義王祥師
敗自刎死於是張先壁馬進忠等皆歸於可望勢益強地與
粵西相接矣冬十月辛巳朔日有食之十一月辛亥廣州破
杜永和奔瓊州甲寅桂林破留守大學士瞿式耜總督兵部
侍郎張同敞皆死之初衡永俱破胡一青趙印選等南走粵
式耜命與焦璉楊國棟等扼榕江既而全川復破榕江兵盡
潰報至梧州乙卯上乘礮船夜發比曉從官踉蹌追走陳邦
傳在清遠聞廣州失劫從官於藤江內閣王化澄吏部尚書
晏清等俱走北流不得達馬吉翔李元胤追及於南甯從官
稍集饑凍無人色乃括行橐並吉翔所獻得四千金散給之
胡一青趙印選率滇兵駐濱州袁彭年自佛山復降於

清十二月命文安之出督師經略川秦楚豫封王光興等為侯伯所謂十三家之兵也

辛卯五年春正月己卯朔上在南園二月柳州破上移駐田州三月使編修劉蒞封孫可望為翼王至平越不得入夏四月戊午皇太后王氏崩於田州五月葬於南園楊美山上尊諡曰孝正莊翼康聖皇后可望以不允秦封使賀九儀張勝張明志等將兵入衛賊殺大學士嚴起恆兵部尚書楊鼎和及給事中劉堯珍吳霖張戴述等皆主不予秦封者也於是始真封可望為秦王八月贈瞿式耜吳國公張同敞江陵伯九月陳邦傳諺殺宣公國焦璉叛降於定南王上聞潯州破駕發南園十月辛亥駕次新園上生母馬太妃徽號曰昭聖

仁壽皇太后冊慈煊為皇太子十二月甲辰朔

大清兵破贛川濱庚午南窗破趙印還胡一背以敗卒同馬
吉翔抵桂灘請上棄舟從陸盡焚龍舟重器而行由土司安
平北雷歸順歸朝一路進發諸蠻各供糗糧給夫役孫可望
既受茶封乃遣其將狄三品陳國能高文貴等以兵三千來
迎並致書從官曰南窗不守當駐安隆從之是時可望已拒
川東西矣

壬辰六年春正月癸酉朔上在歸朝司留九日發戊子次廣
南府孫可望遣總兵王愛秀表請居安隆二月戊申上至安
隆改名安龍府可望歲以銀八千兩米六百石上供從官取
給焉

大清兵入四川可望守將白文選走回雲南定南王自廣西以七百騎出河池州向黔

大兵駐柳州可望乃使李定國與馮雙禮等圖桂林步騎八萬人劉文秀等圖成都步騎五萬人疏聞封安隆封定國西簡王文秀南康王餘各加公侯從可望請也三月壬申朔建行在太廟五月定國等進攻靖沅武岡皆下之兵趨廣西七月癸酉遂克桂林定南王自焚死獲陳邦傳並其子曾禹送貴州伏誅杜永和以瓊州北降南陽侯李元胤及其弟安肅伯李建捷見執不屈被殺劉文秀等陷敘州重慶大清兵出擊大破之全軍俱沒九月李定國北取衡州孫可望亦自至沅州攻辰州府陷之十一月辛未

大清兵遇定國於衡州城下大戰竟日定國不能走遂敗走會

王師遇伏殞定國得收兵退屯武岡是年凡宗藩在貴州者可望漸殺之

癸巳七年春正月戊辰朔上在安龍府李定國自桂桂勝後不復受可望約束可望惡之使人召赴沅議事將殺之定國辭不行徑回廣西可望自追之

大清追兵寶慶與可望戰於花子街殺相傷當可望忽還諸營遂潰

大清兵亦不進各引還以武寶之間為界上在安龍日益窮促聞定國得廣西且與可望有隙乃與內閣吳貞毓等十八

人謀召定國入衛定國感泣許以身報

甲午八年春正月壬辰朔上在安隆府二月開科取士四十名以四川熊渭為第一授庶吉士餘授知縣教職有差可望聞密勅召定國等三月使部將鄭國王愛秀至安隆殺與謀者十八人憾定國益甚定國亦防可望襲之出師掠雷廉夏五月陷高州進圍新會十一月大清兵至與尚耿兩王合擊敗之

乙未九年春正月丙戌朔上在安龍府孫可望遣兵攻常德復敗歸上在安龍塗葦箔以處日食脫粟守將水可望愈更相凌逼挾彈射鳥直入其門文吏乘輿呵殿過之不復下改稱安龍府為安隆歲造開銷銀米冊報可望稱皇帝一員月

吏若干皇后一口月吏若干隱忍延喘息而已李定國既解
新會之圍由高川還守南園十二月孫可望聞其勢不振遣
兵襲之

丙申十年春正月丙戌朔上在安龍李定國敗可望兵於田
州率兵疾趨安龍迎駕入滇可望傾知之先遣白文選至安
龍促上移黔太后聞之哭從官亦哭白文選見之心動因以
情告曰姑遲行俟西府至遂以興徒不集報可望陰留侯定
國數日定國至遂奉之西走雲南可望復使率兵邀之定國
已抵曲靖時劉文秀守滇亦素怨可望聞定國至即納之沐
天波迎上於馬龍驛三月上入雲南居可望府中賜李定國
晉王冊寶封劉文秀為蜀王白文選鞏國公餘俱為侯伯又

以定國記室金新維為吏部侍郎兼都御史龔銘為兵部侍郎加沐天波柱國少師馬吉翔復謫附定國因以文安侯入閣辦事遣白文選還黔慰可望可望恨甚然以未妻子在滇未敢公為逆也

丁酉十一年春正月甲辰朔上在雲南二月甲申東宮出閣講學四月癸酉朔上聖安皇帝廟號曰安宗簡皇帝后曰簡皇后思文皇帝廟號曰紹宗襄皇帝后曰襄皇后皇考廟號曰禮宗端皇帝嫡母王氏曰端皇后下詔大赦五月使張虎送可望妻子赴黔可望既無內顧七月舉兵反詔削其王爵時可望所部至衆定國兵不過數千文秀所將留鎮兵亦少然人心不直可望兵至交水其大將白文選馬進忠馬惟興

馬寶皆叛之遂大敗走挈妻子赴長沙降

清論功封馮雙禮慶陽王馬進忠漢陽王馬惟興殺國公賀九儀廣國公餘將封侯伯者十五人其黨附可望者程源鄭逢元等皆降級十月遣使間道赴海封鄭成功為延平王十一月追贈吳貞毓以下十八人謚蔭有差遣官諭祭立廟安隆

戊戌十二年春正月戊戌朔上在雲南可望入京封義王二月

大清兵從蜀楚粵三路入滇黔李定國使其將劉正國楊武等守三坡紅關諸險防蜀使馬進忠等駐貴州四月庚寅劉文秀病卒可望舊將王自奇闖有才反定國率兵誅之內亂

平而貴州已不守矣是時蜀兵至三坡劉正國由水西奔回
晦日

大清兵克遵義楚兵自鎮遠抵黔馬進忠等亦走五月蜀兵
擊敗楊武於開州之流水七月丙申朔命李定國為招討大
元帥賜黃鉞粵兵拉蜀山川十月三路兵俱集信郡王自北
至會於楊老堡戒期入滇李定國與馮雙禮等拒難公背圖
復貴州別遣白文選將四萬人守七里關抵生界次師示攻
遵義以牽制蜀師十二月蜀兵出遵義由水西以趨天生橋
入烏撒白文選懼棄七星關走回霑益泗城州土官岑繼祿
導粵兵入安隆定國使懷仁侯吳子聖禦之敗績定國由盤
江旋師拒戰連敗於安龍之羅炎涼水井撒砦遂遁回丁丑

報至上發雲南

己亥十三年春正月癸巳朔上次永平縣乙未

大清兵入雲南公侯伯文武吏多迎降丙申上至永昌下詔
罪己李定國還黃鉞待罪自請削秩不許二月白文選敗於
玉龍關初文選自霑益追及定國留之斷後

大清兵以二月癸亥出雲南辛未追賊王國勛兵於普棚丙
子至大理之玉龍關文選於與張光翠陳勝等俱戰敗由沙
木和走鎮康土司總兵呂三桂被殺永昌聞之使沐天波馬
吉翔等隨行己卯至騰越李定國伏兵潞江之高黎貢山中
大清兵抵永昌辛巳過潞江有洩其謀者定國乃出兵戰竟
日寶名望王璽皆戰死定國不能走復遁騰越聞報乘夜走

入南甸平陽侯孫崇雅邀劫資裝於道中時官兵尚四千人
夜疾馳迷道互相驚擾羣臣妻子不及相顧叛卒乘機剽掠
貴人宮嬪亦失去過半矣丙戌抵囊木河十里即為緬境沐
天波入諭始啟關猶勒從官盡棄所攜兵器而後入晦日至
蠻漢土官思綿迎入土司城蠻漢舊為宣撫司屬永昌府自
萬曆中始為緬有三月緬酋以四客舟來迎從官自覓舟渡
江得從者六百四十六人故岷王子及總兵潘世榮內監江
國泰等九百餘人馬九百四十餘匹俱由陸期會於緬甸己
酉至井亘緬人禁弗進遂止其地李定國既敗於潞江走孟
定白文選走不邦己而文選以兵入緬緬使人至井亘求檄
止兵文選戰不勝走回孟良四月初三星昇兵至蠻漢復使

丁調鼎楊生芳往止之沐天波蒲縵王啟隆等謀乘間走之
戶獵之微亦不許五月甲子緬復以舟迎乙丑發并豆丁卯
至阿瓦城距河止焉阿瓦即緬酋所居城也戊辰陸行五六
里赭磴如前陸行者潘世榮等被緬分給土人為奴多自殺
惟岷王子八十人後流入暹羅云緬人於赭磴構臺以棲車
駕置草屋十間編竹為城每日兵士百餘人護之從官各給
結茅散處蠻男婦自來貿易初至饋獻頗豐後漸薄九月緬
進新稻命分給從官之窘者十月戊子朔頒歷於緬李定國
移兵孟艮內有女土官定國破擒之遂拒其城十一月白文
選至與定國合軍十二月文選移營猛壤

庚子十四年春正月丁巳朔上在赭磴三月李定國部將賀

九儀欲出降定國杖殺之其卒多潰還雲南四月白文選移軍景線李定國約遣使約會兵攻緬欲迎上不得敗緬兵於瑞羊岳從官資用盡竭有數日不舉火者上出皇帝之寶命吉翔碎之分給人各數銖九月太白經天凡十有五旬

辛丑十五年春正月辛亥朔上在緬甸緬發兵守隘築木城防守甚嚴李定國於緬戰於洞垵白文選助之復敗緬兵緬終不肯出上先是定國軍洞壩去緬城八十里文選軍象寨去緬城一百十里皆緬東南境也定國密奏曰今與緬王約送何地而諸臣在內何泄泄不以為言也文選駕浮橋梁將濟師緬人斷之不克濟定國遣副將董朝用高三允往得馬良造舟二人焚升降

清五月緬酋以老避位其弟猛莽白代立索賀禮七月復來
言三載供給之勞索報禮俱無以應而咒水之禍作是月丁
丑緬人來請從官過河盟既出以兵圍殺之自松滋王以下
勳臣沐天波武臣馬吉翔王維恭魏豹馬雄飛王起隆蒲縷
王自京襲勳陳謙吳承爵安朝柱任之信張拱極劉朝宗宋
宰劉廣寅一作銀宋國柱丁調鼎文臣鄧士廉楊在鄔昌期鄧
居詔任國璽王祖望裴廷謨楊生芳潘璜齊應選郭璘張伯
宗內監李國泰李茂芳楊宗華楊強益李宗貴沈猶龍周
盧曹等凡四十二人俱被害其未亂而先病故與遇亂
而自盡及貴人王妃百官妻女之前後自殺者不可勝記惟
都督同知鄧凱以病足得免生還為人述其狀云緬殺諸人

後有馳呼而來者云勿害皇帝及黔國公蓋思留以獻也而天波已先死乃復治天波所居室移上及宮眷二十三人入居之並進衣食八月李定國以十六舟攻緬復為所敗獲其五舟乃與文選俱引還十二月丙午朔

大清兵至白文選自木邦降戊申緬送上與太子至軍前明年三月丙戌至雲南府四月戊午望日蒙難年三十八歲太子亦遇害太后及嬪妃后俱入京帝豐頤偉幹貌似神宗而性惡繁重亦頗似之無聲色玩遊嗜好不飲酒雖不甚學而喜聞講論忠義事兩宮盡孝蒙難之日暴風雷雨晝晦士卒皆出涕叢葬於北門之外

逸史夢中之立國也僅矣崎嶇黔粵之間與蠻獠雜處搶攘

竄越罕有[圖]宇然猶文措傾側歷十五年其始也瞿嚴網繆
於內何堵扞禦於外陳張之徒義旗雲舉輯忠貞營亂十萬之
寇分疆駐守然後金王反正於江右咸棟投戈於粵左呂王
楊沐經營滇蜀浸浸乎盡江漢而守之可以有為矣然進寸
退尺朝得夕失卒不能稍有樹立蓋大命有歸強陽餘閭固
天之所不庇者也自瞿何致命而後文吏偷安武將驕暴倚
寇盜為長城託絕域以寄命螫賊內訌忠良屠戮而遺燼以
熄詩曰人之云亡邦國殄瘁豈不諒哉

南疆逸史卷三

南疆逸史卷四

烏程溫睿臨撰

紀略第四

監國魯王

王諱以海高皇帝十世孫也父王壽鏞崇禎十五年

大清兵陷兗州自縊王年幼被執三月不中乃舍去十七年

二月甲戌王嗣位北都之變諸王皆南下宏光元年四月命

暫駐台州五月辛卯宏光避位六月

大清兵入浙潞王亦降閏六月己丑九江道僉事孫嘉績起

兵於餘姚其明日諸生鄭遵謙應之於紹興又明日刑部員

外郎錢肅樂應之於圍波於是兵部尚書張國維至台川與

陳函輝宋之普柯夏卿等共請王出監國即日移駐紹興以
分守署為行在加張國維宋大典宋之普為東閣大學士國
維督師江上大典鎮守金華之普司票擬未幾召大學士方
逢年入直宋之普謝事起章正宸為左侍郎署吏部事李占
春戶部尚書王思任禮部尚書余煌兵部尚書張文郁工部
尚書陳函輝吏部右侍郎分兵列江上畫地戍守方國安守
七條沙王之仁守西興鄭遵謙守小疊孫嘉績熊汝霖錢肅
樂守瓜里加孫嘉績熊汝霖錢肅樂督師左僉都御史進
方國安鎮東侯封王之仁武圖侯七月張國維復富陽命姚
志卓守分水江上之兵每日募食鳴鼓放船登陸搏戰日中
又復轉舫還戍率以為常未幾分餉分地之議起統計浙東

錢糧六十餘萬盡歸方王二軍義師或散或留聽其自為征
勸於是新安王兵散督師所領之營亦不過數百人而已八
月兵部尚書田仰從海道至留為東閣大學士十月壬辰戰
於江上方國安嚴陣以待張國維率步兵翊其後裨將王國
斌趙天祥繼之

大清兵敗追至草橋門下隆武帝遣兵科給事中劉中藻碩
詔於越不奉詔十一月進方國安荊國公王之仁圍國公封
鄭遵謙義興伯王勞軍江上駐蹕西興築壇拜方國安命名
營皆受節制馬士英阮大鍼竄入方營欲朝見王不許十二
月王回越城以謝三賓為禮部尚書尋入東閣鑄大明通寶
錢兵部主事署餘姚縣王正中進所造監國魯元年大統厯

丙戌元年正月己酉朔王在紹興以扈夏卿曹維才為使奉使閩中二月張國柱掠餘姚其部曲張邦璽掠慈谿國柱劉澤清標將也航海依王鳴謙於定海有弓箭五百人乃劫鳴謙入內地行朝震恐署為勝虜將軍始返總兵官陳梧敗於嘉興掠餘姚知縣王正中遣兵擊殺之三月丙寅思宗大祥王於朝堂哭臨三軍編素一日

大清兵入錢塘江王之仁率水師迎戰乘風碎其舟鄭遵謙獲鐵甲八百餘副四月王正中率師渡海鹽破澈浦城五月加孫嘉績熊汝霖東閣大學士兩督師不能軍以其兵付黃宗羲與王正中合師三千人尚寶司卿朱大定太僕寺卿陳潛夫兵部主事吳大斌查繼佐又數百人附之渡海劄譚山

將取海甯以江上兵潰而返時夏旱水涸有浴於江者徒涉往返

大清兵驅馬試之不及腹六月丙子朔數十騎渡江列戍甯清王由江門出海令保定伯毛有倫扈元妃世子出定海張國維陳函輝余煌王思任一作仁皆死之方國安方逢年馬士英阮大鍼等皆降方馬至半途伏誅大鍼死仙霞嶺朱大典猶守金華不下

大清兵攻破之屠其城大典自焚死自金華陷而全閩無一矢之拒矣王之出海也富平將軍張名振棄石浦以舟師扈王至舟山黃斌卿不納飄泊外洋毛有倫扈張妃世子至為叛張國柱劫之北去會永勝伯鄭彩至羣王閩人十月丁酉

王發舟山十一月丙寅次中左所即厦時鄭芝龍方降
清令彩執王以降彩不可匿王而以南夷貌類者服王冠服
居舟中謂守者曰苟事急則縊死以示之芝龍北去乃已芝
龍子成功起海上以中左所為營然不欲奉王改明年為隆
武三年於是鄭彩奉王改次長垣

丁亥春正月癸卯朔王在長垣熊汝霖為相辛未王禡牙出
師提督楊耿總兵鄭聯定遠伯周瑞閩安伯周奎芝平夷伯
阮進蕩胡伯奎芝復海口以參謀林喬舞總兵趙牧守之二
月壬申朔克海澄明日攻漳平失利又明日

清帥救海澄還入於海丙子克漳浦以閩人洪有損為令五
日而陷有損死之鄭西王復建置其裨將王祁復邵府祁營

山中取民間几案數千百張每張懸火線數百炷黑夜順流環城而過守者謂祁兵薄城礮石交下遲明方知其偽守者習之不疑一日祁至遂破四月海口破林喬舜趙牧死之周崔芝還守火器舉六月攻漳州不利七月王親征次長垣會鄭彩周瑞周崔芝阮進之師攻福州敗績八月丙戌克連江十月長樂永福閩清皆下羅源知縣朱丕永賈德知縣錢楷皆以城降以馬思理為東閣大學士林正亨為戶部尚書錢肅樂為兵部尚書沈宸荃為工部尚書劉沂春為副右都御史吳鍾璧為通政使余颺為左都御史林崱為吏科給事中黃岳為吏部考功司郎中大學士劉中藻起兵福安攻福賈州其帥涂登華降辛未鄧藩審理陳世亨以一旅復安固援

兵不繼被執大罵而死吏部文選司主事林塗兵部左侍郎林汝蕭攻福清兵敗皆死之

戊子春正月丁酉朔王在閩安鎮楊耿朱繼祚攻興化克之興化分守道彭遇璣故宏光時御史也令其守將出戰而登陴立明幟守將不敢入癸丑鄭彩殺大學士熊汝霖及義興侯鄭遵謙二月以錢肅樂為東閣大學士江西金聲桓遣其部將郭天才援閩與巡撫佟國鼎有隙遂來降封為忠勤伯王在閩中先後復三府一州二十七縣

大清兵調江廣兩浙之兵來救所復州縣皆陷至是僅留閩德福安二城六月戊戌錢肅樂卒十月馬思理卒以沈宸荃劉沂春為東閣大學士

己丑春正月庚申朔王次沙堤三月實德陷四月福安陷劉
中藻死之六月張名振復健跳所七月壬戌王次健跳閩地
盡失鄭彩亦遂棄王而去名振迎之至浙從亡者為大學士
沈宸荃劉沂春禮部尚書吳鍾巒兵部尚書李向中兵部侍
郎孫延齡兵部職方司郎中朱養時戶部主事林瑛左副都
御史某當作黃宗義此本行朝錄等而誤見全謝山然亭集每日朝於水殿午壬午
王師圍健跳蕩胡伯阮進率其樓船數百至金鼓動天遂解
去封王朝先為平西伯朝先初同張國柱王之仁出海黃斌
卿留之部下不任以事朝先故土司調征塞上累立戰功不
肯鬱鬱居間請徇邊海至奉化之鹿頭四五月而聚兵數千
八月壬辰世子生九月丁酉張名振阮進王朝先共殺斌卿

卿十月己巳王駐蹕舟山劉沂春還閩而張肯堂為東閣大學士朱永祐吏部侍郎孫廷齡戶部尚書

庚寅春正月己卯朔王在舟山九月周瑞周鶴芝樓船三百餘艘分屯溫之三盤以為舟山犄角十月辛巳朔日有食之辛卯春正月己卯朔王在舟山二月乙卯張名振殺王朝先大清兵會攻舟山松江張天祿出滌關金華馬進寶出海門而陳錦總督全師以出定海舟山間之張名振阮進扈王發舟山舟泊道頭八月辛酉

大清兵試舟海口南師以三舟突陣獲樓船隻一戰艦十餘賊十一人而縱之內寅天大霧

大清兵悉拒螺頭門守陴者方覺阮進戰死安洋將軍劉世

勛都督張名揚統精兵五百勇士數千背城力戰殺傷千餘人九月丙子城陷

大清兵相謂曰我兵南下所不易拔者江陰涇縣今舟山而三耳文武吏士死節者甚衆

壬辰春正月癸酉朔定南侯張名振大學士沈宸荃兵部左侍郎張煌言扈王至中左所尋居金門

癸巳春正月戊辰朔王在金門三月王自去監國號

甲午王在金門冬十二月定南侯張名振卒於舟山王震悼賻贈有加

乙未王在金門海澄守將黃梧降於

大清改廈門為思明州設四屯張煌言駐臨門陳文達駐王

環山阮春雷駐楚山別遣將駐牛頭山於是東南不雜髮者
咸來集焉

丙申王在金門永_寧遣使封招討將軍鄭成功為延平王二
月初三日升山城哭雞犬夜升屋而號五日始息

丁酉王在金門

大清下令徙沿海居民於內地四十里

戊戌王在金門

己亥王在金門夏張煌言以鄭成功師入長江破瓜川下鎮
江進圍江_寧為

大清將梁化鳳所敗秋永_寧詔王仍監國晉張煌言秉閣大
學士

庚子王在金門

辛丑王在金門鄭成功率師取臺灣

壬寅王在金門夏四月戊午永曆帝崩於雲南五月延平王鄭成功薨於東甯長子經嗣秋九月十有七日王殂年五十四明年繼妃陳氏生遺腹子宏甲甯靖王術桂收養於東甯逸史曰當義旗初建使方王官受約來渡錢塘而乘北師之初至三吳豪傑尋聲而附未必不可與天下爭衡也乃畏蕙自守叢爾兩府以供十萬之衆即北師不發一天一年之後亦將地無類矣及浙河失守以後以海水為金湯舟楫為宮殿陸處者惟舟山二年御舟稍大名河船其項即為朝房諸臣議事在焉落日狂濤君臣相對亂礁窮島衣冠聚談伶仃

飄絮未罄其形容也有天下者以此亡國之慘圖之殿壁可
以得師矣

南唐逸史卷四

大興傅氏長恩閣鈔本